

# Warwick wen Santam Classic-trofee

Die wynlandgoed Warwick by Stellenbosch is verlede week by die toekenningsgeleentheid van Santam se Classic-wyntrofee-kompetisie in die Taj-hotel in Kaapstad as die algehele wenner van die kompetisie en ontvanger van vanjaar se Classic-wyntrofee aangewys.

Volgens die kompetisie se span Franse beoordelaars was Warwick hul keuse vanweë dié kelder se volgehoue gehalte en elegansie van sy rooi versnit Warwick Trilogy, wat hy jaar ná jaar inskryf. Die wyn uit die 2006-oesjaar was vanjaar die uitblikker.

Die trofee vir die beste witwyn is deur die Hoopenberg Integer Chardonnay 2006 gewen, en dié vir die beste rooiwyn is aan die Vriesenhof Pinot Noir 2007 toegeken.

Klein Constantia het met sy Vin de Constance 2005 die trofee vir die beste soetwyn gewen.

Omdat die beoordelaars niks besonder onder die vonkelwyne gevind het nie, is besluit om nie vanjaar 'n trofee vir die beste vonkelwyn toe te ken nie.

Volgens die beoordelaars was die sauvignons blanc teleurstellend en het nie een van dié wyne uitgestaan nie. Hul geure was te grasagtig, en die wyne was "onryp".

Die cabernets sauvignon en die rooi versnitte was van konstante gehalte, maar dit was die pinot noir-wyne wat die beoordelaars beïndruk het.

Hulle was egter van mening dat die

wynmakers van pinotage op gehalte en elegansie moet konsentreer en teen te veel hout moet waak. In baie van die wyne het hout oorheers, meen hulle.

Die Hoopenberg Integer Chardonnay 2006, die Sumaridge Pinot Noir 2008 en die Reyneke Reserve Red 2007 het vanjaar die GQ-pryse van die tydskrif GQ se wynredakteur, Jonathan Steyn, ontvang. GQ kies jaarliks drie wyne onder die trofee-wenners hiervoor op grond van gehalte en waarde vir geld, en met die gewone verbruiker in gedagte.

Die Classic-wyntrofee-kompetisie is uniek in Suid-Afrika omdat net 'n sekere getal medaljies en trofeeë toegeken word. Volgens die organiseerders word dit gedoen om die legitimiteit en geloofwaardigheid van die kompetisie te versterk.

Die ander wenners van goue medaljies vir witwyne is:

Hamilton Russell Chardonnay 2009, Rudera Chenin Blanc 2008, Villiera Traditional Barrel Fermented Chenin Blanc 2009, en Vriesenhof Chardonnay 2009.

Die ander wenners van goue medaljies vir rooiwyne is:

Cederberg Shiraz 2008, Chamonix Greywacke Pinotage 2007, La Motte Shiraz 2008, Oak Valley Pinot Noir 2008, Reyneke Reserve Red 2007, Rietvallei Esteara 2007, Sumaridge Pinot Noir 2008, en die Veenwouden Classic 2006.



Bo: Mnr. Pieter de Villiers (Domaine Mas Angel), me. Sabrina Durand (organiseerder) en mnr. Jonathan Steyn (GQ).



Links: Twee van die beoordelaars, me. Laure Gasparotto en mnr. Germain Lehodey.

Foto's: VERSKAF



Mnre. Christophe Durand (organiseerder), Anton Beukes (Hoopenberg), Michael Langenhoven (La Motte) en James Dare (Warwick).

Foto: VERSKAF

## Landbou DIE BURGER

Tienke Stander  
Landbou Burger  
Konsultant

Tel: 021 406 2029

Faks: 021 406 4314

Sel: 084 907 2234

# FOKUS

op Kaap Agri week,  
Sitrus, Dieregesondheid  
& Snoeiskêre  
26 Maart 2010